



**PEKELILING  
SURUHANJAYA PENGANGKUTAN AWAM DARAT  
BIL. 9 TAHUN 2014**

---

**GARIS PANDUAN PENYEDIAAN BAS EKSPRES TAMBAHAN PADA MUSIM  
PERAYAAN HARI RAYA AIDILFITRI 2014**

**TARIKH: 04 JULAI 2014**

## **1. TUJUAN**

Pekeliling ini bertujuan untuk memaklumkan tentang garis panduan penyediaan bas ekspres tambahan (“Bas Ekspres Tambahan”) pada musim perayaan Hari Raya Aidilfitri 2014.

## **2. PERKARA-PERKARA YANG HENDAK DIMAKLUMKAN**

- 2.1** Pengendali berlesen bas ekspres (“Pemohon”) boleh memohon Lesen Perubahan Sementara (“LPS”) untuk menggunakan bas-bas di bawah lesen pengendali kenderaan perkhidmatan awam dan lesen kenderaan pelancongan yang lain, tertakluk kepada garis panduan yang telah ditetapkan.
- 2.2** Pengendali berlesen bas ekspres yang berada dalam tempoh penggantungan tidak dibenarkan memohon LPS.
- 2.3** Pemohon juga tidak dibenarkan untuk menggunakan bas-bas di bawah lesen pengendali kenderaan perkhidmatan awam dan pemegang lesen kenderaan pelancongan lain yang sedang digantung lesen atau permit kenderaan untuk tujuan LPS.

## **2.4 Permohonan LPS**

Kelas kenderaan perkhidmatan awam dan kelas kenderaan pelancongan yang dibenarkan untuk digunakan sebagai Bas Ekspres Tambahan adalah:

- a. Kelas lesen bas sekolah
- b. Kelas lesen bas pekerja
- c. Kelas lesen bas catar; dan
- d. Kelas lesen bas persiaran.

**2.5 Bas-bas yang hendak digunakan sebagai Bas Ekspres Tambahan hendaklah sama ada di bawah lesen milik Pemohon sendiri atau dimiliki oleh pengendali berlesen atau pemegang lesen yang lain.**

## **2.6 Garis Panduan Permohonan LPS**

**2.6.1 Permohonan LPS hendaklah dibuat oleh Pemohon yang juga bertanggungjawab ke atas penjualan tiket-tiket Bas Ekspres Tambahan di kaunter tiket. Agen tiket tidak dibenarkan memohon LPS.**

**2.6.2 Permohonan hendaklah dibuat menggunakan borang LPS Musim Perayaan.**

- 2.6.3 Tarikh akhir permohonan LPS bagi perayaan Hari Raya Aidilfitri 2014 adalah pada 24 Julai 2014. Permohonan yang diterima selepas tarikh tersebut akan ditolak.
- 2.6.4 Borang permohonan LPS boleh didapati dari pejabat-pejabat S.P.A.D. yang berhampiran atau dimuat turun dari laman web rasmi S.P.A.D. di [www.spad.gov.my](http://www.spad.gov.my).
- 2.6.5 Setiap borang permohonan hendaklah diisi dengan lengkap dan jelas. Borang permohonan yang tidak lengkap dan jelas akan ditolak.
- 2.6.6 Contoh tiket Bas Ekspres Tambahan cetakan komputer hendaklah disertakan bersama-sama borang permohonan. Tiket ini hendaklah sama dengan tiket yang dijual kepada penumpang sepanjang tempoh sah laku LPS.
- 2.6.7 Kadar bayaran bagi setiap permohonan LPS adalah sebanyak Ringgit Malaysia Dua Puluh Sahaja (RM20.00).
- 2.6.8 Permohonan hendaklah dikemukakan ke pejabat-pejabat S.P.A.D. (kecuali ibu pejabat S.P.A.D).

2.7 Terminal-terminal bas ekspres dan Bas Ekspres Tambahan bagi musim perayaan Hari Raya Aidilfitri 2014 adalah berdasarkan terminal operasi bas ekspres sedia ada yang dibenarkan oleh S.P.A.D dan lain-lain terminal yang ditetapkan oleh Pihak Berkuasa Tempatan.

## 2.8 Syarat Khas Bas Ekspres Tambahan

- 2.8.1 Bas yang hendak digunakan sebagai Bas Ekspres Tambahan hendaklah berusia tidak melebihi sepuluh (10) tahun daripada tarikh ianya dibuat.
- 2.8.2 Bas Ekspres Tambahan hendaklah mempunyai cukai jalan dan perlindungan insurans yang masih sah mengikut Bahagian IV, Seksyen 90 dan 91 Akta Pengangkutan Jalan 1987.
- 2.8.3 Permit Kenderaan yang sah dan masih beroperasi mengikut kelas lesen asal hendaklah sentiasa dipamerkan di dalam Bas Ekspres Tambahan.
- 2.8.4 Salinan LPS hendaklah dipamerkan di dalam Bas Ekspres Tambahan.
- 2.8.5 Bas-bas yang diluluskan sebagai Bas Ekspres Tambahan boleh beroperasi sebagai Bas Ekspres Tambahan hanya dalam tempoh sah laku LPS tersebut sahaja.

- 2.8.6 Bas Ekspres Tambahan hendaklah mengambil dan menurunkan penumpang di terminal atau hentian bas yang ditetapkan. Bas Ekspres Tambahan tidak dibenarkan untuk mengambil dan menurunkan penumpang diluar kawasan terminal atau diluar hentian bas yang ditetapkan.
- 2.8.7 Bagi perjalanan melebihi tiga ratus kilometer (300 km) atau melebihi empat (4) jam berturut-turut, Bas Ekspres Tambahan diwajibkan untuk mempunyai pemandu kedua dan buku log pergerakan yang sentiasa dikemaskini. Pemanduan empat (4) jam berturut-turut tersebut merangkumi apa-apa waktu berhenti rehat yang diambil dalam tempoh perjalanan tersebut.
- 2.8.8 Mempamerkan pengenalan Bas Ekspres Tambahan pada cermin hadapan bas dengan butiran yang berikut:
- a. nama syarikat bas ekspres;
  - b. bilangan perjalanan; dan
  - c. destinasi.
- 2.8.9 Bas Ekspres Tambahan hendaklah mematuhi jadual perjalanan atau masa operasi seperti yang dicetak pada tiket.

- 2.8.10 Bas Ekspres Tambahan hendaklah memberikan perkhidmatan dari tempat permulaan perjalanan sehingga ke destinasi akhir bas tersebut mengikut laluan yang diluluskan. Bas Ekspres Tambahan tidak dibenarkan membuat pertukaran penumpang di sepanjang perjalanan.
- 2.8.11 Salinan Jadual Tambang dan Permit Perkhidmatan Pemohon yang mengeluarkan tiket hendaklah dibawa bersama di dalam Bas Ekspres Tambahan untuk tujuan pemeriksaan.
- 2.8.12 Bas Ekspres Tambahan hendaklah sentiasa berada di dalam keadaan yang memberikan keselesaan kepada penumpang ketika beroperasi.

## 2.9 Penjualan Tiket

- 2.9.1 Pemohon hendaklah memastikan urusan tiket dilaksanakan seperti berikut:
- a. semua tiket bas ekspres dan Bas Ekspres Tambahan yang dijual dicetak dengan cetakan komputer;
  - b. semua tiket dijual di kaunter tiket yang sah;
  - c. jumlah tiket yang dijual hendaklah padan dengan jumlah tempat duduk bas yang

berkenaan. Tiada penumpang dibenarkan berdiri dan setiap penumpang hendaklah duduk di tempat duduk seperti yang dinyatakan pada tiket.

d. menyatakan maklumat berikut pada tiket bas :

- (i) nama syarikat bas ekspres yang mengeluarkan tiket tersebut;
- (ii) harga tiket;
- (iii) nama terminal bas;
- (iv) nombor pendaftaran bas;
- (v) bilangan perjalanan;
- (vi) masa;
- (vii) nombor rujukan tempat duduk;
- (viii) destinasi perjalanan dan
- (ix) nombor telefon untuk dihubungi sekiranya kecemasan.

## 2.10 Caj Tambahan Bas Ekspres Tambahan

Tiada caj tambahan dibenarkan untuk operasi bagi semua Bas Ekspres Tambahan yang beroperasi sepanjang tempoh LPS.

## **2.11 Tempoh Sah Laku LPS**

- 2.11.1 Tempoh sah laku LPS bagi musim perayaan Hari Raya Aidilfitri 2014 adalah dari 19 Julai 2014 sehingga 4 Ogos 2014.**
- 2.11.2 Sekiranya Pemohon membuat permohonan LPS selepas 19 Julai 2014, tempoh sah laku adalah bermula dari tarikh kelulusan LPS yang diberikan oleh S.P.A.D. sehingga 4 Ogos 2014.**

## **2.12 Tanggungjawab Pemohon LPS**

- 2.12.1 Pemohon adalah bertanggungjawab ke atas penjualan tiket sepanjang musim perayaan tersebut bagi tempoh sah laku LPS.**
- 2.12.2 Pemohon yang menjual tiket Bas Ekspres Tambahan adalah bertanggungjawab dalam memastikan jumlah tiket yang dijual tidak melebihi jumlah tempat duduk di dalam bas yang disediakan.**
- 2.12.3 Pemohon adalah bertanggungjawab dalam memastikan operasi dan pengendalian Bas Ekspres Tambahan di setiap laluan berjalan lancar.**

- 2.12.4 Pemohon hendaklah memastikan Bas Ekspres Tambahan yang digunakan memberikan perjalanan yang selamat dan selesa kepada penumpang. Penyaman udara Bas Ekspres Tambahan yang digunakan hendaklah berfungsi dengan baik sepanjang perjalanan. Bas Ekspres Tambahan yang digunakan hendaklah mempunyai ruang duduk yang selesa.
- 2.12.5 Pemohon hendaklah memastikan penumpang hanya membawa bagasi bagi kegunaan persendirian dan bukan untuk tujuan perniagaan, perdagangan, tunggangan dan keuntungan; dan
- 2.12.6 Pemohon hendaklah memastikan semua penumpang mempunyai tiket bercetak komputer yang sah, yang dikeluarkan oleh Pemohon.
- 2.12.7 Pemohon hendaklah memastikan Bas Ekspres Tambahan mematuhi jadual perjalanan atau masa beroperasi seperti masa yang dicetak pada tiket.
- 2.12.8 Semua syarat lesen pengendali berlesen bas ekspres seperti yang dinyatakan di Lampiran 1 adalah terpakai kepada Pemohon.

### **3. TARIKH KUATKUASA PEKELILING**

Arahan-arahan dan perkara-perkara yang dinyatakan di dalam Pekeliling ini berkuat kuasa mulai 4 Julai 2014 .

**“BERKHIDMAT UNTUK NEGARA”**



**MOHD NUR ISMAL BIN MOHAMED KAMAL**  
Ketua Pegawai Eksekutif  
Suruhanjaya Pengangkutan Awam Darat